

## Ina rolla per Bruno Cathomas?

Sagogn e siu contuorn el film da televisiun «Amur senza fin»

■ (anr/abc) Igl atun proxim vegn il vitg da Sagogn ad esser center d'in film ch'il rescissur svizzer Christoph Schaub ei vidlunder da preparar. Quei ha il president communal confirmau a caschun dalla davosa radunanza communal. Ei detti in film liung da kino, pia buc in film documentar. Il regissur da quel seigi Christoph Schaub. Il cineast svizzer ei staus responsabels per films sco «Gotthard», «Sternenberg», «Giulias Verschwinden». Era biars films documentars ha el fatg, denter quels zacons romontschs. Per exempel «Il project Vrin» da 1999, ni «Cotgla alva» da 1997. El collavura ed ha collaborau cun Bruno Ganz, Matthias Gnädinger, Ursina Lardi, Sabine Boss, Jürg Schneider. Adina puspei promovua Schaub era acturas ed acturs giuvens e regularmeins eis el presents als festivals da Cannes, Locarno, Solothurn, Berlin ed auters.

Actualmeins ei Schaub vidlunder da preparar siu proxim project. Igl ei in film da televisiun cul tetel romontsch «Amur senza fin». Ei sctracta d'ina produziun

romontscha ed el center da quella ein il vitg ed el contuorn da Sagogn. Da quei ha il president communal Hanspeter Casutt informau dacuort la radunanza communal. Il film raquenta la historia d'in vitg ch'ei, pervia dalla munconza generala da pers, gia dagitg senza augsegner. Ed ussa vegn finalmeins in niev plevon, quel porta denton novas ideas e vent frestg. Quei plai als ins dils parochians, ed als auters buca. Plaunsiu gartegi agl augsegner da scuvierer ils conflicts zuppai el vitg, da sligiar quels e da gudignar ils habitonts.

Sco quei che Casutt ha getg vegn la gronda equipa da cineasts il settember ed igl october a Sagogn. Il film vegn realisau tenor ina idea ed iniziativa da Mariano Tschuor. Davart la repartiziun dallas rollas – cunzun quella rolla digl augsegner – e detagls dil scenari ha la producenta, la Zodiac Pictures Ltd., aunc buc informau. Ins savess denton s'imaginar che Bruno Cathomas, igl actur da Laax sesents a Berlin, fuss predestinaus da sorprendere la rolla dil protagonist da quei film.



Ellas streglias da Sagogn e sil crest-baselgia vegn filmau il settember ed october d'uonn.

FOTO A. BEELI

## Guder, scuvierer ed esplorar

Era questa stad offerescha Sumvitg Turissem in program special ad indigens e turists

DA HANS HUONDER / ANR

■ «Scuvierer valurs a S. Benedtg», «Menu dalla tatta» ed «Explorar a pei la vischnaunca da Sumvitg». Per la secunda ga porscha Sumvitg Turissem a glied da lunsch e da maneivel in pign, mo interessant program da stad. Sumvitg ei buc in liug da turissem cun attraziuns ch'attilan las massas da glied. Totonon dispona la vischnaunca d'ina sempla, mo biala purschida cumbinada oravontut cun la natira e la cultura. Las pusseivladads da viandar, oravontut atras la Val Sumvitg entochen sin la Greina ni era en Val Russein ed entuorn ils vitgs dalla vischnaunca, ein numerusas. Leutier dispona Sumvitg d'entgins loghens da sentupada sco Plaun Petschen ni era la caplutta da S. Benedtg ch'attila adina puspei era glied interessada vid l'architettura. Cun ses mieds finansials mudests emprova Sumvitg Turissem da porscher in program che sedifferenziescha empauer dalla purschida per la massa en auters loghens.

### Spisas da pli baul

Igl onn vargau ha l'organisaziun da turissem da Sumvitg iniziou pliras interessantas purschidas ed uonn vegn cuntinuau cun quellas. Ina da quellas ei il «Menu dalla tatta». Naven dalla proxima fin d'jamna entochen l'entschatta d'october offereschon tschun ustrias ella vischnaunca da Sumvitg specialitads a lur hosps. Il «Menu dalla tatta» cumpeggia spisas da pli baul ch'ei idas per part en emblidonna. Mintgina dallas tschun ustrias offerescha in agen menu. Sco quei ch'il president da Sumvitg Turissem, Andy Momm, di, ein tuttas ustrias stadas cuntenzas cun las frequenzas igl onn vargau, aschia che tuttas separticipeschon puspei a quella purschida. Igl ei quei l'ustria Val en Val Sumvitg, l'ustria dalla Staziun a Sumvitg, il restaurant Greina a Rabius, l'ustria Placi pign a Surrein e l'ustria Cruna a Sumvitg. La partenza da quella purschida vegn fatga la fin d'jamna.

### Denter las streglias

Il fenadur ed uost seporschan treis caschuns d'emprender d'enconuscher la vischnaunca da Sumvitg. Il guid Clau Solèr meina las participontas ed ils participonts atras la vischnaunca che secumpona da plirs vitgs. Schegie che Sumvitg para d'esser ina vischnaunca nunspectaculara sezuppan davos sia cultura, structura economica e topografia in tschuppel interessants detagls. Nuota meins interessanta ei era la viseta digl uclaun da S. Benedtg ch'ei enconuschents oravontut pervia dalla caplutta. Il guid Vitus Bass dat denton era investa ella historia dalla caplutta veglia ch'ei vegnida disfatga dalla lavina 1984 e ch'exista oz suletameins aunc cun parts dils anteriurs mirs. Bass dat in'investa ella veta da pli baul egl uclaun e co ins viva oz en in vitg da muntogna sco S. Benedtg. Quella viseta digl uclaun cun guid vegn organisada quater ga.

### Sanaziun piazza da giug

Quels dis entscheivan las lavurs da renovaziun dalla piazza da giug a Plaun Petschen sper la punt dil Rein a Cumpadials. Ils urdeins dalla piazza ein rodund 30 onns vegls e basegnan ina renovaziun ni in remplazzament, quei gia ord vesta dalla segirtad. Entgins han gia stuii vegnir demontai pli baul essend ch'els ademplevan buca pli lur funcziun. La piazza da giug vegn visitada stediameins d'indigens, mo era hosps da vacanzas ed era gudida da viandonts ni ciclists. Tenor Monn cuozan las lavurs da renovaziun rodund treis jamnas. Il di dalla fiasta nazunala igl emprem d'uost ei previu ina fiasta d'inauguraziun. Igl ei previu da renovar parts dalla piazza e dils urdeins, mo era da remplazzar ina part da quels. Suentar la renovaziun duei la piazza da giug seprestar en niev vestgiu e cun entginas attraziuns supplementaras pils affons.

Uteriurs informaziuns: [www.sumvitg-turissem.ch](http://www.sumvitg-turissem.ch)



Sumvitg Turissem offerescha era questa stad ina purschida supplementara a hosps ed indigens.

FOTO H. HUONDER

## Ina nova purschida el Puntreis

In niev post da cussegliaziun ella casa da vegls e da tgira a Mustér

■ (anr/abc) Nicole Candinas ei buca stada el center – e tutina eis ella la persuna principala. Venderdis sera ha la secziun grischuna dall'Associaziun svizra dad Alzheimer inaugurau il niev post da consultaziun a Mustér. A Glion exista in post gia. Rita Montalva ei la persuna da contact en Surselva per casas da vegls e da tgira, per confamiliars e glied che ha da far culla malsogna da demenza. Da niev dat ei uss era in post per la Cadi. Dr. Raimund Klesse, il president dalla secziun grischuna dall'Associaziun svizra dad Alzheimer, ha plidau venderdis sera da quella malsogna. Ella deriva da disturbis cerebrals ed ei para che adina dapli carstgauns seigien pertuccai. Sco il specialist ha declarau ha quei ina clara raschun: Nus vegnin adina pli vegls. Las pli novas cefras dalla statistica muossan che 144'000 persunas en Svizra fuvan igl onn 2016 dementas ed ina prognosa lineara muossa ch'il diember s'augmenta tochen igl onn 2040 sin 1'780'000. El Grischun deva ei igl onn 2016 3'700 persunas cun quella diagnosa. Klesse ha accentuau che la malsogna da demenza seigi buca dolorosa, pia ch'ils pertuccai piteschien buc exnum ed ins sappi vegnir vegls cun Alzheimer ni demenza.

### La memoria che pren cumiau

Cunzun a glied che ha aunc mai giu da far culla tematica, ni che manegia che quella seigi lunsch naven, enconuscha buca la situaziun dils confamiliars.

Sch'ina mumma che viva persula a casa entscheiva a metter ils scalfins en frestgera sa ei esser in signal ch'il disturbi cerebral entscheiva. Gest el stadi d'entschatta seturpegia la persuna pertuccada, pertgei ils disturbis vegnan e vargan. Tiels confamiliars crescha perencunter la malsegirtad. Savens vegnan ils confamiliars era malidis e sevilan forsa, beinvulent e se-

spruond da migliurar la situaziun. Sco Klesse ha declarau san ins denton buca medegar la malsogna, quella ei irreversibla. Tier la gronda part dallas persunas entscheiva ina demenza ella vegliadetgna denter 80 e 95 onns. Ei dat differentas fuormas, la gronda part, numnadameins 60 pertschien, ei Alzheimer. Dasperas dat ei la demenza vasculara, demenza front-

temporal e demenza caschunada d'atras malsognas, per exempel multiple sclerose ni blessuras dil tschurvi.

La malsogna ei cunzun dolorosa pils confamiliars, pertgei la persuna malsaua «sespiarda», ella pren plaunsiu cumiau. Demenza sa limitar la memoria, l'orientaziun, il lungatg, igl enconuscher e gl'agir, e lu era las funcziuns da planisar, organi-

sar e giudicar. Sco il specialist ha denton accentuau eis ei impurtont da tgirar e mantener il contact permanent cul pazient. Gest leu entscheiva la difficultad, pertgei igl ei in pensum stentus d'esser cheu trasora. «Il persunal da tgira conferma che las persunas pertuccadas sesentan bia meglier sch'ellas han regularmeins visetas», ha Klesse explicau. Ins stoppi impedir che pazients da demenza s'isoleschian.

### Il niev post a Mustér

Suentar il referat ha la meinagestiuon dalla secziun grischuna dall'associaziun d'Alzheimer, Anita Laperre, dau ina survesta dils survetschs. Lu ei Nicole Candinas, la cussegliadra ch'ei staziunada a Mustér, seprentada. Grazia a quei post da cussegliaziun ella Casa da vegls e da tgira Puntreis ston habitonts dalla Cadi buca pli viagar tochen a Glion per ina cussegliaziun specifica tier quella tematica. Candinas ei competentada da cussegliar co ins dueigi reagir, co ir entuorn cun malsegirtads, nua encurir ulteriurs cussegls, tgei far per cumbatter l'isolaziun ed auters cussegls ni motivaziun nizeivla per dumignar il mintgadi. La mesadad dils pazients d'Alzheimer e demenza viva a casa. La statistica muossa che 500'000 confamiliars vivan dapresent ensemen a casa cun pazients dements. La gronda part da quels, numnadameins 65 pertschien, ein il partenari ch'ei sauns, en 28 pertschien dils cass assistan ils affons a bab ni mumma cun Alzheimer.



Nicole Candinas (dretg) ei la persuna competentada che cusseglia a Mustér en fatgs da demenza ed Alzheimer. Seniester Anita Laperre, la menadra da gestiun dalla secziun grischuna d'Alzheimer.

FOTO A. BEELI